

■ CONVIVENZA

Confess d'ina studenta perfecta

DA VIOLA PFEIFFER*

Jau na sun betg perfecta. D'ina massa chaussas ch'jau fatsch na sun jau betg loscha. Jau na legel bunamain mai ils texts ch'jau duess leger per l'uni. Jau dun la bucca da mias amias ensemen cun outras amias. Jau fatsch reproschas a mes ami pervia da nagut. Jau scriv lavurs per l'uni senza avoir in'idea da la tematica – e vegn tras cun tut. Jau spid mintgant schlogns sin via. Jau empost extrem blera vestgadira sin Zalando e tramet pupsè enavos tut.

Sche jau na mangel betg ina giada l'emna in burger u in döner hai jau il sentiment ch'jau haja manchentà insatge. Jau bit mintgant chaussas en il rument ch'ins pudess reciclar. Jau cumpr frajas l'enviern. Jau cumpr maila da l'Africa dal sid, era sch'i dess da quella da la Svizra. Jau cumpr charn da migros budget e prix garantie. Jau fatsch mintgant en il tren fotos da glied cun vestgadira curiosa e tramet quella a mias amias. Jau met zutger en mes té e di a mes ami ch'jau n'haja mess en nagin.

Jau sdiavlel bler memia savens sur da mes frar. Jau telefonesch bler memia darar a mes tats e tattas. Jau cumpr ina massa cosmetica ch'jau na dovr betg. Jau cumpr giaccas per 400 francs e tir en ellas mo duas giadas. Jau cumpr chalzers per 500 francs e rump els entaifer dus mais. Jau empost cudeschs da scola tar Orell Füssli u Weltbild enstagl dad ir en la libreria pitschna sper l'uni.

Jau dovr per mintga tschavera paintg – tuttin tge ch'igl è. Jau fatsch



avant vegetars uschia sco sche jau chattass super tge ch'els fan, ma atgnamain pens jau ch'i saja tgutg. Sche jau vom a curren, lura cun l'intenziun da mangiar suenter insatge total malsanadaivel. Jau guard entiras serias entaifer in u dus dis – cura ch'jau duess atgnamain emprender. Jau sforz mes ami dad emprender per ses studi, ma ses lura vi da mes computer e legel artitgels sin «www.tagesanzeiger.ch».

Jau chargel giu musica e films senza pajar. Jau legel en mintga heftli ch'jau chat la rubrica «In & Out» ed hai in plaschair nar sch'insatge ch'jau fatsch stat en la part dad «In» ed insatge dad insatgi auter sut «Out». Jau zup cartas postalas che na ma plaschan betg davos outras, e cura che la glied che ha scrit ellas vegn sin visita met jau davanttiers ellas. Jau stiz mintga foto da mai ch'è dischavantagiusa, era sche tschels vesan ora super.

Jau hai ina giada scrit ina lavur d'in cudesch ch'jau n'hai gnanc legi e survegni in 5,5 persunter. Durant seminaris m'annunziel jau mintgant e di simplamain quai che tschel ha ditg avant mai, mo cun auters plets. Mintgant quint jau si tge ch'jau fatsch en il perchasa mo per che

mes ami survegnia ina nau-scha conscienza. Ina raschun da plazzar mes cudeschs uschè prominent en biro è da laschar pensar tuts ch'jau saja intelligente.

Mintgant fatsch jau ritschs en mes chavels cun in furmatschurrichels e di lura ch'els sajan natirals. Jau fatsch grimasas davos il dies da glied che sa prenda memia seriis. Jau refus da princip d'utilisar glischs da spargn. Jau di a mias amias che chaussas stettian super ad ellas, era sch'i n'è betg uschia. Mintgant stun jau mal ch'jau contribuesch mes puncts da cumulus a l'agid da fugitivs. En la mensa di jau mintgant ch'jau veglia ina purziun gronda, era sche jau hai strusch fom. Ma per cletg na sa nagin da quai. Uschia pon tuts pensar vinavant ch'jau saja ina studenta superperfecta.

*** Viola Pfeiffer studegia germanistica, istorgia e rumantsch a l'Università da Turig. Mintgant lavura ella per la «Südostschweiz», mintgant per il «teletext» e mintgant sco scolasta, ma bunamain adina scriva ella.**

Vocabulari

confess – Bekenntnis(se)
 dar la bucca – lästern
 far reproschas – Vorwürfe machen
 spidar schlogns – Kaugummis ausspucken
 bittar – werfen
 rument – Abfall
 fraja – Erdbeere
 zutger – Zucker
 sdiavlar – fluchen, schimpfen
 paintg – Butter
 tgutg – dumm, doof
 chargiar giu – herunterladen, downloaden
 avoir in plaschair nar – sich diebisch freuen
 far ritschs – Locken wickeln
 furma tschurrichels – Lockenstab
 glisch da spargn – Sparlampe

Unterstützt von der Lia Rumantscha